



SACRA CONGREGATIO
PRO CULTU DIVINO

De Patronis constituendis

1. Patronus, liturgica acceptione, beata Maria Virgo, Sanctus vel Beatus intellegitur, qui ob antiquam traditionem vel legitimam constitutionem ut protector seu apud Deum advocatus celebratur.

2. Patronus distinguitur a Titulo vel Titulari alicuius ecclesiae, congregationis, communitatis, etsi Titulus patronatum aliquomodo expostulat.

3. Patroni habentur :

a) *locorum* (scilicet nationis, regionis, dioecesis, civitatis, oppidi vel pagi, paroeciae);

b) *familiarum religiosarum*;

c) *personarum moralium, sodalitatum, institutorum, coetuum* sive ecclesiasticorum sive laicorum.

ELECTIO PATRONI

4. Patroni eligi possunt *beata Maria Virgo*, sub aliquo titulo in sacra liturgia accepto, *Angeli* et *Sancti*. Beati nequeunt eligi Patroni absque peculiari Apostolicae Sedis indulto.¹ Semper excluduntur divinae Personae.²

5. Patronus unus tantum sit. Licet duos vel plures Sanctos Patronos eligere, si iidem Sancti una simul in Calendario inscribantur.

¹ Cf. *CIC*, can. 1278.

² Cf. S. Congr. pro Cultu Divino, Instr. *Calendaria particularia*, 24 iunii 1970, n. 28: *A.A.S.* 62, 1970, pp. 651-663.

Ob peculiare rationes, alius Patronus, tamquam secundarius, quandoque additus est. In posterum, unus tantum Patronus de more habeatur.

6. Patroni locorum eligendi sunt a clero et a fidelibus seu ab illis, qui sub protectione Patroni ponentur.

Patroni familiarum religiosarum, personarum moralium, sodalitarum, institutorum, coetuum, eligendi sunt ab iis, ad quos spectat, seu a membris familiarum religiosam, personam moralem, sodalitatem, institutum, coetum efficientibus.³

Electio facienda est sive per consultationes seu suffragia sive per petitiones seu subscriptiones.

APPROBATIO PATRONI

7. Electio Patroni approbanda est competenti auctoritati ecclesiasticae, id est: *Episcopus* pro dioecesi, *Conferentia Episcoporum* pro provincia ecclesiastica, regione, vel natione, *Capitulum provinciale* pro provincia religiosa, *Capitulum generale* pro universa familia religiosa. Pro personis moralibus, sodalitatibus, institutis, coetibus in diversis orbis partibus exstantibus, res proponatur Sanctae Sedi.

CONFIRMATIO PATRONI

8. Electio et approbatio Patroni confirmandae sunt a Sacra Congregatione pro Cultu Divino.⁴

Ad confirmationem obtinendam, mittenda sunt ad eandem Congregationem documenta, quae sequuntur:

a) petitio auctoritatis localis, sive ecclesiasticae sive, pro opportunitate et possibilitate, civilis;

b) acta, postulationes, subscriptiones, quae electionem comitantur eamque manifestant necnon relatio, in qua rationes exponuntur ob quas electio facta est;

³ Cf. S. Congr. pro Cultu Divino, Instr. *Calendaria particularia*, n. 30.

⁴ Cf. *ibid.*, n. 30.

c) testimonium de approbata electione ex parte competentis auctoritatis ecclesiasticae.

9. Confirmatio conceditur per Decretum praedictae Congregationis et, quoad Patronos amplioris dicionis, etiam per Litteras Apostolicas in forma Brevis expediendas.

10. Sicubi cultus et pietas erga Patronum iam constitutum vel ab immemorabili acceptum, decursu temporis extincta sunt, aut de eodem Sancto nil certum cognoscitur, minime impeditur quin, re mature perpensa, novus constituatur Patronus, servatis iis quae supra statuta sunt.⁵

CELEBRATIO LITURGICA PATRONI

11. Celebratio liturgica competit solummodo Patronis rite constitutis vel ex immemorabili traditione acceptis. Ceteris vero, qui Patroni sensu latiore dicuntur, merae pietatis causa propositi, nullum competit peculiare ius liturgicum.⁶

12. Celebratio Patroni loci vel oppidi vel civitatis, personae moralis, sodalitatis, instituti, coetus, peragitur gradu *sollemnitatis*. Quae sollemnitatis gaudet *praecedentia* super omnia festa in Calendario generali vel particulari inscripta et super dominicas temporis Nativitatis et « per annum ».

Celebratio Patroni dioecesis, provinciae, regionis, nationis aut amplioris territorii et provinciae religiosae peragitur gradu *festi*.⁷ Rationibus tamen pastoralibus suadentibus, v. gr. quando Patronus magnum momentum habuit in historia cuiusdam regionis aut valde colitur a fidelibus, festum Patroni fieri potest sollemnitatis.⁸

Patronus loci aut amplioris dicionis celebrari debet etiam a religiosis⁹ et ab iis qui Calendario proprio gaudent.

⁵ Cf. *ibid.*, n. 33.

⁶ Cf. *ibid.*, n. 29.

⁷ Cf. *Normae universales de anno liturgico et de Calendario*, n. 59.

⁸ Cf. S. Congr. pro Cultu Divino, *Calendaria particularia*, n. 8.

⁹ Cf. *Normae universales de anno liturgico et de Calendario*, n. 52c; S. Congr. pro Cultu Divino, Instr. *Calendaria particularia*, n. 16d.

13. Familiae religiosae gradu sollemnitatis per se peragere possunt tantum celebrationem aut Patroni aut Tituli aut Fundatoris inter Sanctos relati. Attamen, peculiaribus in adiunctis petere possunt, ut ex his duae sollemnitates habeantur.

14. Patroni secundarii olim constituti celebrentur gradu memoriae obligatoriae.¹⁰

15. Patroni olim constituti propter peculiare circumstantias historicas, itemque Patroni olim propter extraordinaria adiuncta, v. gr. pestem, bellum, aliamve calamitatem vel propter cultum specialem nunc remissum, electi, in posterum uti Patroni amplius ne colantur.¹¹

Ex aedibus Sacrae Congregationis pro Cultu Divino, die 19 martii 1973, in sollemnitate Sancti Ioseph, Sponsi beatæ Mariæ Virginis.

ARTURUS Card. TABERA
Praefectus

✠ A. Bugnini
Archiep. tit. Diocletianen.
a Secretis

¹⁰ Cf. S. Congr. pro Cultu Divino, Inst. *Calendaria particularia*, nn. 9, 12.

¹¹ Cf. *ibid.*, n. 32.